

四當齋集

丁丑夏邵章題



四當齋集卷七

長洲章鉅

七文

王文成公象贊

人心陷溺若水東馳汜濫衡決何術挽之公有學說曰致良知直下承當息狂醒癡內識

眞我外忘險巇茲爲儒效百世可師龍場荒驛

像在貴州故龍場驛

神化所基金昭玉粹天留表儀

神州莽莽大定何時我式遺像慨乎有思

明遺民王道樹先生像贊

先生文恪公鑒口世孫明亡隱胥門外山鄉廟田舍不入城市裔孫季烈學部乞隱君

顧麟士畫胥江屏跡圖摹遺像卷首從大連寄津請題

世臣之裔義不二姓鏹迹埋照昔吾先正天下已任秀才一个能立高節風世尤大事在

明季貞隱朱

用純柏廬

徐

侯齋

蘇賢鼎足身瘁魂愉宰木誰鄰孝子顧鳳清絕胥江過者必拱

鮑淥飲先生像贊

窮年兀兀與丹鉛爲緣而猶署知不足之榜以自寫其拳拳嗚呼劬書者夥矣疇則如先生之專後有來者一燈誰傳

秀水金蘭坡先生像贊

三代渺矣道以器存薛王欵識實導其源先生晚出古歡是敦東南法物來萃邱樊何以傳之繭紙百番津逮後學寶等璵璠攬古攀古簠齋疊軒好或一致功難同論旁及鑒賞不眩犁軒顛船迂閣通夢交魂雅業攸纘猶子從孫奕世文學至今清門叔未壽臧禾中祭尊先生嗣之笙磬篴塤光風霽月如對周元墨林導師景行曷諼

天津華屏周先生像贊

壁臣閣丞世奎之封翁

乾有四德幹事曰貞家國攸賴扶危定傾公乎體此鬱爲宗英獨立不懼有孚乃亨萬鍾夷視一柱孤擎躬躬翬翬用庠厥生一家以託一鄉以程仍澹大劫甦此滄瀛蠅聲紫色變我三正赫赫庭誥天日晶明荀陳長德後嗣不廢幸哉有子貽之令名澤物宜社教忠宜旌通沾七十二長流頌聲

金山吳梅心學師履剛象贊

融齋學派傳者先生括以持志木鐸有聲昔胡安定來館高平心向往之爲士作程道山往矣尙穆然於鬱林之石古與滄浪之水清

七姬像贊

畫像在四歐堂藏明拓本七姬墓志後

三心五噉垂曜江東賦命不猶秉性寔同變彼諸姬先後媵潘女君伊何公主隆安黃葉西風大義激我請死君前誰云不可逝者孤鳳從者六鷁雲路先翔以待賢嫡金翠異色赤石等心七絃迸絕如剖素琴鬼蝶相依神鴉自訴不如山塘五人有墓作箴繼張

張羽文

招魂託宋

宋克書

盍築齊雲香升花供蘭亭眞帖留此一紙雌霓連蜷用光彤史

楊節母傳贊

無錫楊實甫

紹洙

奉其繼母陳節母傳乞爲表揚時節母歿四十餘年實甫則篤老矣母

慈子孝足風天下企瞻聳慕乃爲之贊

懿歟節母本陳歸楊早喪所天履冰嚙霜撫孤成立歸魂茫茫

天子嘉之綽楔有光我

讀其傳子爲華出母則繼也鞠育如一閱數十年濡淚有述觀子之爲知母之實凡今之人忘親者多親猶可忘遑論其他懿歟節母操行則那幸哉有子砥此頽波龍山崩巖鸞

溪漣漪慈雲雖遠清風自吹我欽其節益懷其慈敬書影堂慨乎有思

胡孝女傳贊

孝女江甯胡氏濱江鄉小廠圩人父家聲世農家也少而從父習勞未嘗入塾宣統二年庚戌六月初二日夜將半有盜匪十餘毀門入劫按家聲於地手利刃威謁悉索所有少遲回間被傷六處野曠月黑四無居鄰家人又以凶醜不可當且戰不知所爲計女始猶哀求於匪旋以將致死其父也攬身障父亂刃交下中要害而踣匪乃肆掠颺去父得免視女則僵血泊中氣絕久矣時年一十有四越十載庚申吾友謝受之觀察以狀告爲慨然於數千年敦敍彝倫之天下雖屈勢窮運極而激發於鄉里弱女子者猶轟轟烈烈如斯也是可尙已贊曰

嗟嗟今世邪說誣民我觀人子亦非昔倫偉哉孝女扞父戕身單門弱質致此何因其因伊何天地正氣一往直前無怖無畏節士貞臣得此而貴借曰無之不如鸚鵡昔者聖人教從孝始舍生得仁迺一女子撐拄兩閒不在都士黎洲有言不我廷矣人心陷溺烈於猛淥之子之行賢喟愚懔百行孝首以式南邦湯湯揚子此亦娥江

林門謝貞女像贊

衛風柏舟兩髦我特毛公傳之髦爲子飾是共姜開守貞之先孔子嘉之錄以爲式後儒
援禮各抒胸臆誠足彌人道之窮而奚以立人紀之極懿歟女士矢言不食竟生異而死
同與共姜而合德乃我先朝章明風烈之所遺而令今之喪失本心者聞風而失色請
配孝娥大書深刻

恭忠親王外孫女費烈婦傳贊

大義所在難乎一決如彼志士赤石不奪秉氣也正見理也眞天上有月人間無春於鑠
賢王外孫有此豈況中壘拾遺彤史傳爲烈婦弟溥德作賀蘭萬丈貞厲題碑章明風教式此王姬

業師沈賚卿先生諱紹僞祭文

嗚呼吾師竟止於斯陡頽嵩構天何不慈犖犖大者予薈莫知感恩知己請白其私我初
負笈惟師之昆師三兄諱紹傑字廉卿問年舞勺詩禮初溫芭方問字玉遽招魂有瞽失相偃偃何

奔師顧而嘻云爾也可爲悼哲翬以愛推我我礪我砥我揚我簸豈止三月春風可坐嗟
我嚴君其時居貧燈續斷帶甌開吹塵駒跳犢觸不羈不馴有脯十束羊瘦尠倫幸哉吾

師壹是寬假批朱抹鉛時時獎借郡縣小試霜晨月夜借裘添衣擎燭覓舍齊轡整鞭若馬就駕臨行又回若姆訓嫁紀述師恩非筆非舌春之噓枯水之飲熱一十餘年髓決心折豈況母弟弦姻更結師從妹歸予弟鑑今歲秋九我隨師行尙顧小子謂當有成小至初屆猝傳師病頗聞瞑眩願見未請豈圖翌晨一走闖來躑躅哭寢不知所哀一瞑萬世天乎痛哉師之遺言明明在耳師之遺文明明在紙登師之堂撫師之几獨師音容已矣已矣戴人一惠感激漣洏如師厚我顧曰不悲師徂何所我報何期汎瀾陳奠儻歆予卮

吳江吳祭酒師祭文

嗚呼世變乃至於斯前事已矣不必贅辭獨其封狼毒虺之蹲踞詡談者在國家根本之地而人心震動并不遺恤緯之嫠臺防既撤則江浙閩廣諸行省甚累卵而可危猶之重門洞開而管鑰則他人主持且其狡謀尤在內地通商一歛閒閒下子悉成殺著如國手之布棋蘇臺乾淨土又將是窟是宅而腥臊羶膩鬱蒸於鶴市與雞陂士生於此殤乎如泛梗於絕港煥乎如靡萍於中達而凡逆料他日者幾幾使祝宗祈死而不願身親見之而吾師之吉祥善逝乃不先後適丁其期小子無狀且爲吾師幸而不徒爲吾師悲吾

師平昔固嘗獨居深念齋嗟涕洟特持躬慎密而風旨所表襮弟子不得記門外不得窺英靈未沫必將直排天閭使沈醉之大帝一噴一醒無夢夢於天位之尸 列祖 列宗之神聖英武庶幾佑啟其後俾開中興之運建長治之基其輔翼而成化者近若曾左胡彭諸宗臣亦得陰相勸翊旋天紐而斡地維萬一九州之大人人才熄滅猶是山川猶是種姓亦必稍假時日毓秀而孕奇而後正氣以復邪氛以埽還百年以前之舊重覩夫乾坤之清夷吾師亦得淩雲一笑而引滿於一卮否則生者不能爲死者可爲而不爲吾師亦必標擗於雲路不敢諉諸大化之推移吾徒無聊之言嘗謂今日得志大都小夫與纖兒觀老成之代謝疑九京之下爲君子道長之時斯言而信吾師今日方將吐未吐之氣伸未伸之眉平生親契爲鍾所敬事者若長房一老尤將歡然道故以相娛嬉較之柴立人世塊獨無語蒿目者滄海橫流之局沈吟者長安不見之詩孰舒孰促孰鬱孰怡吾師之去此而卽彼曾不勞揅著而灼龜且夫心喪者從學之至情哭寢者禮家之成規蒙也何心乃獨顛倒迂謬其詞則所以激而出此者吾師必昭鑒乎在茲是下顧方來無涯之慟也而非僅區區感恩知己之私

公祭嚴侍郎文

年月日崇化學會同人等敬以清酌庶羞致奠於範孫嚴侍郎之靈曰學貫通時尤貴稽古嗚呼我公用心獨苦古者云何義理訓詁爲國之粹爲人之譜寶書重譯覃及西土安得自誣視爲朽腐翬翬我公凜焉四顧於易取兌於禮取醵相輔相成別開學府作育海濱庶幾鄒魯有堂洞明繫公之宇萬卷美富亦公所具坐聽弦歌忘寒忘暑莞爾而笑此中翹楚吳地有學高平創舉教始鄉人公儀其矩期望無窮大命有數伏枕淹旬此焉厪注天不憖遺俄悲大暮罷社輟春甯惟學侶忝在同人感公鼓舞前路何知公當呵護盛德大業中外欽慕姑述一端雲霄毛羽絳闕道山神游何處薦此馨香諒公不吐尙饗

仁和吳子修年丈哀詞

後宣統辛亥之十三年甲子三月聞我年丈子修吳先生考終杭第之訃老成代謝海內驚歎道遠未克行弔敬陳哀悃昭告几筵詞曰

嗚呼古人有言主辱臣死借曰未死亦苟活耳其在於今翩其反爾亦姑謀樂藏身海市天步艱難罔知何底分痛云何忍而爲此喬木世臣東南夥矣積鬱損年乃有君子彼君

子兮延陵之吳玉堂老鳳軒翥上都屢拜 特簡大雅輪扶繩祖翼子當今誰乎昊天不
弔一星云徂夢爭王室將伯誰呼心則葵藿身則菰蘆雞羣中散魚腹左徒抱石懷沙一
瞑亦易委蛇委蛇曰有所冀彼昏不知因以爲利甘聽羣魔噉人而戲報國文章傳惟忠
義曷爲傳之用存人類人壽幾何終焉憔悴忍淚看天銜悲入地嗚呼哀哉小子無狀辱
在下風浮雲世改孤月心同湖山有美我亦欲東人天遽隔此憾何窮平生師友侍講鄒
公腐心時變減食告終丙戌翰苑雙峙華嵩以爲臣鵠爲天下勸忠嗚呼水非水兮山非
山春非春兮夏非夏願眞宰之訴天炳大明於長夜庶光贊乎彛常更斡旋乎元化冀公
靈之我聞忘衆笑而愚詫嗚呼哀哉

天津嚴持約哀詞

咄咄怪事報君驟死天道與善乃至於此君體充碩君性敦厚戕生縱欲戒之在舊粲粲
門子責在一身識時俊傑如日方新上侍下教大事未完凡所倚仗千緒萬端那有死理
更無死相日邁月征前途靡量如何可死君亦知之如何竟死誰爲爲之嗚呼哀哉明德
之後達人宜有不食其報乃罹厥咎惻惻新悲沈沈舊痛俯仰幾何人生一夢繫君厚我

實推先好世講拳拳於今也少我負先公學會其一忝擁皋比教思無術君觀先公必道其由望實不孚抑予之尤嗚呼哀哉攬春暘兮何長歎朝露兮何速撫來日兮大難且爲君兮一哭嗚呼哀哉

妻兄王紹延哀辭

木標狗噬滔滔何責獨有我兄丹青金石時風衆勢侈君營魄曾不中壽乃返眞宅昏婚之故劣及廿年蔣山歇浦綢繆周旋君鏗萬石我倚一羶魚忘驂靳跡判情聯昊天不弔侮我當陽旣移國枋復亂天常變相皆魅反噬胥狼六朝五代無此陸梁走也木彊忍爲此態蒙面欲從撫心難味與蓬俱飄無蔽可采屢屈昏途莫喻流輩君獨然之寓書遠道天醉不醒歲寒且保積牘幾尺七更涼燠但畔牢愁不添煩惱歲之二月賦詩寫懷詩語云何魂銷春回未幾示疾鴻雁不來將疑將信有夢徘徊不謂考終先立夏日惡讖有憑遂成絕筆楚壘壁呵魯縻緯恤卓然完人誰疇誰匹屈曲世閒得死誠幸身後瑣瑣矧具眞冷獨有邁親悽涼暮景此去冥途得無咽哽我獨諄君可快所爲請排閭闔代訴民悲撥亂反正翳天所尸誰令擾擾一至於斯作孽非民罹旼民獨人爲刀砧我爲魚肉痛

並釜煎冤同盆覆眞宰上訴非君而孰庶幾一旦上帝聰明光我聖道揚我天聲毋俾大地終焉淪傾英靈如此雖死猶生昔在庚子籌筆見功逮乎辛亥抱節見忠落落大事我知始終我言必踐我文不工平生志事百未一伸故山歸計又失情親牙絃匠斲知契何人津橋獨立愴焉傷神嗚呼哀哉君竟先我劫後一面幽明遂左白日昭回罡風揚簸懸文几筵知君淚墮

元和顧隱君誄

隱君諱麟士字鶴逸晚署西津元和顧氏憑藉世業天賦超人博涉多通畫尤卓絕鉅以同里同庚名志相好者數十年國變以來益申歲寒之契歲庚午四月某日考終城西別墅聞耗之次慨然於蘇賢之流風餘韵至此而盡也傷逝自念誄以達之詞曰
同輩論交傳人幾箇及身千秋早爲君賀大樹飄零罡風騰簸竟不憖遺一邱長臥聿稽鑒賞過雲一樓畫筌書笈並世尠儔黃門雅尙玉山勝遊風流文采乃詒孫謀君繩其武益恢其界書福墨緣有隆無殺價定青萍珍羅金薤震爆一時乃屬於畫畫人夥矣哲匠云徂南宗正脈豈不在吾造化爲師古也爲徒肯託漫浪嚇彼賈胡書如其人畫亦同理

獨寄高閒一空塵滓蹈矩循規以生以死以槩生平不煩僂指嗟我與君同誕乙丑笙磬
韋絃其交耐久此外何人曹子雲頤三牛成犇曾開笑口荒荒壞劫歷歷前塵葉落糞本
終圖買鄰草閒雙笠得話悲辛如何南望處土星淪烽火長途於何赴哭通夢交魂煙雲
幾幅慰我何真奪君何速君儻有靈亦憐我獨嗚呼哀哉古處兮畢生永訣兮此日珍蓺
兮誰傳清暉兮誰述脫諸苦而遊太空兮固知君淩雲之一唾嗟苕華蕞楚之吾生兮尙
飾巾而待畢嗚呼哀哉石田雲館世有師也立身有本畫其枝也翳君後起能總持也上
質古昔寸心知也小雅盡廢今何時也道隨運往焉可支也雲車風馬不可追來者茫茫
今爲誰是傷心人無涯之一慟不知者或謂此區區交誼之私也嗚呼哀哉

父執俞麗生先生小傳

乙未十有二月二十一日鈺既視俞丈麗生之斂襄事而歸惘惘然有所不釋於懷寒燈
深坐萬感紛來乃舉君生平行誼爲鈺所親聞者書畀遺孤以表鈺不忍死君之心曰如
君者可謂今之善人也矣而濟人之急拯人之難尤熟在人口云同治初元蘇垣收復君
始市一屢羅列磁銅玉石與夫法書名畫之屬榜其齋曰師竹勤勤懇懇日益昌大三十

餘年中皆手自綜理小大井然與交接者曾未見其疾言遽色雖僕隸傭保下之已甚以非禮犯者咸馴之擾之得笑容而去所業介上下之交游食之徒皆挾其所得趾錯於門而攻玉攻石與夫潢治雕鏤髹漆之執一藝以求食者炊火不繼疾病死喪之待醫待殮商於君靡弗應歲盡之夕有所苦累不能自脫訴於君之門君雖不能盡如人意而來告者必少有以賙之歲若以爲例冬之衣米夏之時證丸劑泊各善堂局勸募之款約略稱是恤嫠恤孤及老而無依之計月給錢者常數十人丁亥之夏近鄰不戒於火勢張甚幾及君之居救者譁於門曰此地宜無慮俞某不應罹此卒無恙人人推重孚於平日固不獨既歿之日愴然聞行路太息聲也君少失讀而分別眞贋有神解收藏家咸以君所評隲爲可信君於世俗嗜好一不有犯自奉至約而誠篤謙畏同乎儒者鉅與君同里閭先公與君雅故鉅娶於胡君所媒也母弟與君尤習所以相貺者至厚蓋頻年以來君以故人子弟視予兄弟予兄弟亦敬事之至相得也君疾於八月垂起矣又以勞頓體虛致劇月之十九時加酉雨雪交下忽心動亟視君君已喘息不能言且言且喘得百餘語子扶於牀目以屬鉅鄭重分明言銘感者三四鉅懷欲有所陳以君氣息不屬未敢竟其詞也

夜向曉而君竟逝矣生道光某年某月某日年五十有四君諱田增吳縣人娶朱氏子二長瑞華早卒娶王氏次瑞銓聘錢氏頗敦厚庶幾承父志云

論曰世變亟矣任卹之風既渺工心計者并舉小民錙銖之利一網盡之問其施舍與否則甯窮奢侈於無等之欲而於此則不能拔一毛煢煢寒苦訴籲無門而外人乃假仁假義以收拾我人心焉如君者固里黨所仰賴者也積里黨而爲鄉積鄉而爲縣積縣而爲天下其於治化豈云小補君顧僅得下壽豈天道之無知耶抑留以有待耶嗚呼難言之矣獨如鈺者行能無算自信猶難君乃以至重大者見託其將何以無負乎君哉蓋輟轉思之而幾於失眠也

吳縣王君鑑庭傳

君諱子鑑字鑑庭號秋恬姓王氏江蘇吳縣人也青箱門業烏衣貴游紱冕所興令聞在舊考贈通奉大夫某某公樂志邱園棲神家術廢舉式計然之術岐嶷符商瞿之祥君其幼子也第五之行齊聲於何準無雙之譽方駕於黃童固將荆玉開瑩湘蘭扇烈樽木之枝捧日大鵬之翼垂雲乾蔭俄摧謬臺獨上薛包故產并空取荒引老之資陶朱雅才乃

充候時轉物之用削柱作杙鑄鏡爲刀鄉里大師交口雷歎國家度支所入以鹽課爲一
大宗江南尤曰奧區淮北是其總會山銅並采尙沿吳淠之風地錢四流爰重劉晏之選
君銀手能斷金諾弗渝妄言賭乎酬縑潛計邁乎炳燭遂乃甘儕商季相與錢通法孔氏
之雍容鄙小吏之乾沒綠楊城遠江通海晦之鄉翠竹天寒雪虐風饕之況境至窮力至
瘁也逋寇鷗張中原魚爛伏莽竊發行李不前嘗於鳳臺縣境猝遭相翔齊斧掠抄僅以
身免綠林一隊託結寨自保之名綵綆五紋操擒賊得王之券殃徒授首豪右失魂草薶
禽獮羣欽膽略於是藏名都市戢影江湖獨駕王尼之車拚賣趙岐之餅會逢舊雨試行
淮綱以君夙有幹名傾心委重其之吳陵也精良綜事部分如流江皖鄂湘聯絡一氣維
時曾文正公方奉 詔辦賊駐節安慶念離務之有關大局也特可幕府郭公嵩燾之薦
下檄任君清風兩袖不染其脂膏連雲萬艘罔愆乎期會恢恢方格總總員程倣落權輿
翳君是賴又以圍攻金陵供張軍米船漕車轉不少廝留不韋秦賈曾無居奇之心弦高
鄭商雅有濟變之略上襄國計下勑軍儲君子表微宜告惇史君柴立有骨溪盎爲懷利
輕鴻毛義重熊掌流亡未集慨分續命之田緩急有資遠仿長生之庫加以少無俗好轉

益多師與人也無町畦律已也無厓岸馬援誠子之牘遠道而必將晏嬰禦寒之裘凋年而始御雖復蔗境從容榆年頽老而考亭近思之錄涑水資治之編靡不抉心執權探根躡窟晚歲自號臨履而知君清脩雪白非復尋常耆舊也已同治丁卯某月某日考終里第壽五十有七子三人某某以君私淑高平夙有瞻族之志敬承遺矩式廓洪基嗚呼必有三公之遺澤既永世克延毋愧一字之大文豈後生能述勉撮大槩用詔方來贊曰充路儒冠匪心伊面蹈義若淵趨利如箭圭璋失榮斗筭淪賤光岳有靈哲人斯見懿彼哲人翼翼欽欽寄跡賈區遊神學林豈儒厥面乃儒厥心佩賢戴哲足恥子衿與物無忤與天爲徒廣施耆用先聖所俞介石不奪激流豈濡齋入汨出靈衛神扶嗟嗟吳蒙古道幾息實賴老成昭示凱式螭暑不延鳳德可卽萬禩千春是倣是則

先考朝議府君事略

府君諱瑞徵字蘭舟姓章氏爲五代閩太傅仔鈞公三十七世孫曾祖考諱何德祖考諱明考考諱國彪吾家自二十八世祖諡公以後族居諸暨泰南鄉世以務農爲業洎吾曾祖府君始與伯兄明揚公改而服賈明揚公之杭吾曾祖則之蘇迨吾祖考兩世均居閬